

Minister Refunjol a treat prensa ayera, celebrando su 30 año den Gobierno

ORANJESTAD (AAN) — Manera custumber, ayera mainta a tuma lugar e conferencia di prensa di Consejo di Minister, cu a conta cu presencia di Minister di Enseñanza señor Fredis Refunjol; señor Ramon Lee, titular di Labor, Cultura y Deporte, hunto cu director di Museo Numismatico, y miembronan di e Fundacion Juan Mario Odor; y Minister Presidente, cu a finaliza e rueda di prensa.

Ademas, Minister Plenipotenciario, riba contacto telefonico, a duna pueblo informacion riba e yegada sin contratiempo di e grupo di studiantenan na Hulanda, antayera.

Prome persona cu a hiba palabra ta Minister di Enseñanza señor Fredis Refunjol, kende a elabora riba e fechanan fiha como "atv dagen" pa 2004, a duna comentario riba e yegada di studiantenan na Hulanda. Den un gesto masha agradable, Minister Refunjol a comparti un treat cu miembronan di prensa relaciona cu su 30 año den servicio di Gobierno, cu el a cumpli dia 1 di augustus, contando su periodo como educador, como Parlamentario y como Minister.

Tambe minister a duna un relato corto riba su trayectoria, y el a gradici prensa pa su colaboracion tanto durante e tempo cu e tabata



meneer y despues director di school, y den su trayectoria politico, y mas reciente-

mente pa e manera responsable con prensa a cubri e incidente cu e avion di KLM cu mester a transporta e "Arubaleningnan".

Tambe e dignatario a gradici mayornan pa e forma con nan a tuma e situacion, y mas cu claro no a keda sin

manda palabranan di danki na e studiantenan pa nan actitud madura.

UN TRAYECTORIA DI 30 AÑA:

Minister di Enseñanza señor Fredis Refunjol a duna prensa un relato corto riba su trayectoria di 30 año den Gobierno. Asina aki e man-

datario a expresa: "Boso por a tuma nota cu tabata tin un treat chiquito awe, pa motibo cu mi kier a comparti, aunque un poco humildemente cu prensa y cu pueblo, e hecho cu dia 1 di augustus mi a haci 30 año di servicio.

Na April cu a pasa mi a cumpli 20 año den politica y dia 1 di augustus 1973 mi a cuminsa traha na Heilig Hart College; mi a para ocho año dilanti klas, y di ey cinco año mi tabata cabesante. Ainda mi curazon ta ayanan pasobra e ta un lugar caminda mi a traha masha dushi mes, den nos bario, y despues di esey, pa puro casualidad door di un conversacion cu mi tabata tin cu señor Betico Croes, mi a drenta den politica. Esey tabata binti año pasa tambe", e mandatario a relata.

El a sigui splica cu el a asumi diferente tarea den gobierno, unda el a traha nueve año como miembro di Parlamento y ocho año como Minister. Esaki ta nifica 13 año na school, nueve na Parlamento y ocho como minister, pues un trayectoria di trinta año en total.

DEN PARTIDO MEP:

Como integrante di Partido Movimiento Electoral di Pueblo, Minister Refunjol tabata tin e honor di a ocupa diferente funcion, entre otro Secretario General di MEP posicion cu e ta ocupa te awe, for di año 1988.

"Secretario General ta reemplaza e lider, ora cu e lider ta pafo di Aruba. Por lo demas mi tabata vicepresidente di MEP tambe for di año 1984 te 1987, y mi a ocupa e

puesto di minister den tres diferente Gabinete Oduber. Den dos ocasion mi tabata informado, y formado na año 2001, pues ta e tareanan cu mi a checuta den e funcion di politico, minister, y miembro di Parlamento".

UN DANKI SPECIAL PA PRENSA:

Minister Refunjol a probecha e oportunidad pa gradici prensa, pa e cooperacion cu semper el a haya den su trayectoria aki di 30 año, tanto na school pasobra e tempo ey e tabata tin contacto regular cu prensa, como den su rol di politico. "Un danki special ta bay na prensa pa e forma con a cubri e desenlace cu tabata tin cu e partida di nos studiantenan pa Hulanda, unda mi a haya cooperacion hopi biaha riba man.

Nos a yama prensa pa pidi cooperacion pa pasa na radio e ultimo desaroyonan y tambe pa notifica mayornan. Mi kier a gradici boso tur inmensamente, y mi ta kere cu e mayornan tambe pa e forma con e proceso aki a worde cubri".

Tambe e mandatario a gradici e mayornan y e studiantenan mes cu a comporta na un manera sublime.

Riba potret por mira e mandatario na momento cu Prome Minister a dune man pa felicite pa su tres decada sirbiendo pueblo den gobierno, como politico y gobernante.